



IJAMBO RISHIKIRIJWE ABARONGOYE IGISAGARA CA BUJUMBURA NA
AMBASSADEUR PIERRE CLAVER NDAYICARIYE, UMUKURU W'UMURWI CVR
USHINZWE GUTOHOZA UKURI NO KUNYWANISHA ABARUNDI KU WA KANE,
ITARIKI 22 MUKAKARO 2021

Nyakwubahwa Mukuru w'igisagara ca Bujumbura,

Banyakubahwa mwaje muserukira ibiro vy'Umukuru w'igihugu
n'Umushikiranjanji wa mbere,

Banyakubahwa mwaje muserukira Inama Nshingamateka na
Nkenguzamateka,

Ba Nyakwubahwa Mwaserukiye Umushikiranjanji w'intworo yo
hagati mu gihugu,

Banyakubahwa murongoye amakomine agize igisagara ca
Bujumbura,

Ba Nyakwubahwa murongoye amazone,

Ba nyakwubahwa murongoye amakaritiye,

Bakomiseri namwe bakozi b' Umurwi CVR dusangiye ubutumwa,

Bashingantahe, Bapfasoni,

Munkundire dushimire Imana Rurema ku vyiza ikorera igihugu cacu. Nshimire kandi mwese mwatwitavye uno munsu mutwereka ko mushigikiye ubutumwa bw'Umurwi CVR ushinzwe gutohoza amakuba yazingamitse igihugu n'imiryango hamwe no kunwanisha Abarundi.

Mu gutangura rino jambo, twagomba tubanze kandi dushime ikaze mwatwakiranye muri ino ngoro y'amanama, kugira ngo tunganire ibikorwa n'ubutumwa umurwi CVR washinzwe n'inzego z'igihugu.


Nk'uko mubizi, Umurwi CVR umaze igihe utohoza ingene agateka ka zina muntu kahungabanye mu mwaka wa 1972. Tumaze imisi itari mike dukorera mu ntara z'igihugu. Twahereye i Karusi ku mutumba Bukirasazi muri Komine Shombo, tuhakura ibisigarira vy'abantu bishwe 7348 ; i Gitega muri Komine Giheta , ahitwa Mashitsi : twahakuye 1751, ahitwa ku ruzi Nyambeho : twahakuye 204 ; ahitwa Nyabunyovu : twahakuye 902.

Mu Bumanuko bw'igihugu aho umurwi CVR umaze gukorera, mu Rumonge, n' i Nyanza-Lac : tumaze kuhatora ibisigarira vy'abishwe 1435. Twarakoreye muri komine zose za Makamba ; twarakoreye i Bururi. Abishwe batowe ibisigarira birababa 3008.

Ariko nkuko umurwi CVR wama ubishikiriza Abarundi n'amakungu hari abishwe benshi basangukiye mu mashamba, abandi batawe mu nzuzi. Hariho n'ibinogo vyinshi umurwi utaratora kuko ababizi batinya canke batipfuzza kubitwereka.

Banyakubahwa mwese,

Mu minsi iheze naho, mwaravyumvise duheruka mu ntara ya Muyinga aho twashoboye kwegeranya ibisigarira vy'abishwe 452. Muri Kirundo habonetse abarenga 157. Mu majambo make, turamaze kuronka amakuru ku vyabaye muri izo ntara ahatari hake

A handwritten signature in black ink is written over a circular official stamp. The stamp contains the text 'MINISTRE DE L'AGRICULTURE' and 'RÉPUBLIQUE RWANDAISE' around the perimeter, with a star in the center. The signature is a stylized, cursive 'M'.

ku vyerekeye iyicwa ry'abantu isinzi bahitanywe n'urwimo rw'agahomerabunwa rwatanguye itariki 29 Ndamukiza 1972. Ivyo bisigarira twadondaguye twarabishize mu bubiko bw'imfatakibanza.

Ariko ubutumwa bw'uyu murwi CVR bushigikirwa n'amakuru duhabwa n'abapfakazi n'impfuvyi zaciye muri ayo makuba; abakozi ba Reta, abacamanza canke abasirikare bakukurutse bemeye kubwira umurwi ivyo babonye. Ivyo vyitwa « Auditions des témoins » canke « Auditions des personnes ressources ». Turafise n'abacikacumu bagarukiye ku cobo baduha inkuru; turamaze kuronka n'abanyonga ibiduga vyimvye ibinogo vyatawemwo abantu; canke abatwara amakamy ashomba abishwe.


Banyakubahwa mwese,

Uno musu uri hejuru, Umurwi CVR waramutse uganira n'inze zirongoye igisagara ca Bujumbura kugira turabire hamwe ingene twotohoza ukuri ku mabi yahekuye imiryango mu 1972 hano mu gisagara ca Bujumbura. Bujumbura cari igisagara gikuru c'igihugu.

Aha rero nta nkeka, dushikiriye ku ntimatima y'aho ingingo zafatirwa kera mu gihe c'urwimo rwahekuye Uburundi. Dushitse hano, mu gisagara ca Bujumbura, aha hoze ari Umugwa Mukuru w'igihugu, ngo mudufashe kurondera abaduha ido n'ido ry'inkomoko y'akabi n'akabibi kabaye ico gihe ntavuze n'iyi kuzanyeye.

Umurwi CVR uzobumviriza. Abakuze bakiriho bazotuyagira ivyo babonye n'ivyo bibuka; ivyabashikiye; canke ivyashikiye imiryango yabo. Muzotwereka ahoba hari ibinogo vyatawemwo abishwe mu rwimo.

Mw'ijambo rimwe, Umurwi CVR ugiye gutangura gutohoza ukuri kwerekeye igisagara ca Bujumbura n'imicungararo yaho. Ibikorwa



nyezina bizokugururwa ku musi wa kabiri w'indwi iza, itariki 27/7/2021. Ibirori bizotangura isaha zitatu hafi ya SODECO n'Ishengero benshi bita Zion Temple ku Buterere *Nyagatare*.

Ayo matohoza akazofasha kumenya ukuri ku bwicanyi bwabaye hano mu 1972 n'inkurikizi zabwo. Ariko tuzobikorana ubuhinga mu buryo bifasha Abarundi kwiyinga gusumba.


Ntihagire rero umuntu n'umwe atinya gusohora ukuri. Ukuri kurabohora igihugu; ukuri kurabohora imiryango yabuze n'imiryango y'aboba baracumuye ku bandi. Uburundi bwipfuzwa kubaka kazoza k'amahoro ashingiye ku kuri gutsimbataza inkingi zo kunywanisha Abarundi bose.

Kandi ntiduhendane; nta mahoro arama ashoboka tugendera hejuru y'ibinogo vyatawemwo abacu; tugendera ku kinyoma, uburyarya n'ububeshi.

Ukuri tuvuga ni kumwe; ni kumwe guca mu ziko ntigushe. Ni kwa kuri kuzira kwita abantu ikivunga ngo ni abamenja canke abicanyi. Ni kwa kuri gufasha gutandukanya umwicanyi n'intore. Ni kwa kuri kuzira kwitiranya umwicanyi n'abana biwe canke umukenyezi wiwe. Uburundi bunyotewe ukuri kutinyegeza inyuma y'ubwoko canke imigambwe.

Dufashe rero dutohoze ku vyashikiye Uburundi mu rwimo rwo mu 1972. Duteye itambwe dutangure ikivi gishasha; twige kandi dutohoze ivyabaye mu 1988. Twongere dukorane n'Abarundi bose dukorere ku bwicanyi bwabaye mu 1993 n'imyaka yakurikiye, igihe hagandagurwa Umukuru w'igihugu aherutse kwizerwa n'Abarundi, Prezida Melchior NDADAYE.

Ivyabaye imbere ya 1972, umurwi CVR bimwe urabirembeje: 1960, 1961, 1965, 1969, 1971; hamwe n'ibihe bitoroshe vyaranze intwari y'abanyamahanga (Abadagi n'Ababiligi).

A handwritten signature in black ink is written over a circular official stamp. The stamp contains the text 'COMMISSION' and 'RWA'.

Ariko nk'uko abakuze benshi babizi, urwimo rwo mu 1972 rwateye amaganya n'agahinda Abarundi benshi ; abapfakazi n'impfuyi barabura ayo bacira n'ayo bamira. Nta mupfakazi yarira ; ntawagandara ; ntawagandutse. Abavyeyi basigaye n'impfuyi bose bitwa abamenja.

Banyakubahwa mwese,

Ni kubera iki CVR igeze gukorera mu gisagara ca Bujumbura?

Ubwa mbere : Bujumbura hari Umugwa mukuru wa Poritike w'igihugu cacu c'Uburundi. Wafatirwamwo ingingo zose, kandi hari incabwenge nyinshi. Hakorera Reta n'Ibiro bikuru vya gisirikare.

Ubwa kabiri : Mbega hari ibinogo muzi vyatawemwo abishwe ? Nimwitegure mubitwereke. Tugiye gushira amasandugu ku biro vya Komine zose ; hanyuma abatinya kutwegera bandike udupapuro bashire inkuru muri izo sandugu.

Ubwa gatatu : Abishwe mu 1972 bava mu buzi butandukanye : Abagize Reta, Intwazangabo mu gisirikare no mu Kijandarume ; abakozi ba Reta bakurubakuru, abajejwe intwaro, abihebeye Imana, abadandaza, abagwizatunga n'abenegihugu basanzwe barahitanwe n'urwo rwimo.

Ubwa kane : Muri abo bishwe, benshi barishwe batabwa mu gahinga. Ababo basigaye bakiriho buzuye agahinda n'amaganya. Mu vyo Umugwi CVR ushinzwe rero, harimwo no kubabaza ingene ibisigarira dutora vyoshinguranwa iteka.

Ubwa gatanu : Mu vyo Umugwi CVR ushinzwe kandi harimwo kumenya ingene Abarundi bokwiga gusaba no gutanga ikigongwe ; bigasaba gutsinda ubwoba n'ishavu.



Tuboneye ho akaryo ko kumenyesha ko aho hose CVR yagendeye iriko irarangura imirimo, abafise amabanga yo kurongora abandi ni bo bafasha kurondera Abarundi bakuze, eka mbere n'abanyamahanga, bazi ivyabaye muri 1972.

Ico mukwiye kumenya kandi, ni uko Abarundi bagenda imitima yarakomeretse. None indwano yo mu mitima yacu tuzoyitsinda gute tutamenye ivyabaye ? Ni vyo Nyenicubahiro Umukuru w'igihugu amaze imisi yigisha aho aciye hose.

Ico kibazo nyamukuru nico ndabashikirije. Mu mwanya muto rero turayaga ; muduhe ivyiyumviro ; mubaze ibibazo ; mwongere muterere.

Hatangura amasanamu abereka ivyo tumaze kurangura. Ayo masanamu aravuga kandi arivugira. Ivyabaye mu 1972 ni agahomerabunwa. Ariko kandi ngo ntawukira ico atarwaye.

Ese Abarundi babuze ababo twokwiga kubahoza ; abakoze amabi bakicisha bugufi ; bagasaba ikigongwe Imana, igihugu n'imiryango yahekuwe. Kuko barya bantu Umurwi CVR utora mu binogo ntibiyishe ; barishwe, bicwa bunyamaswa.

Tugire amahoro, ubumwe, iterambere n'ugutsimbataza agateka ka zina muntu.

Murakoze.

Contact : 76493700

